

VODIČ KROZ VISOKOŠKOLSKE BIBLIOTEKE BOSNE I HERCEGOVINE

Prikaz

A GUIDE TO ACADEMIC LIBRARIES OF BOSNIA AND HERZEGOVINA

Review

VODIČ kroz visokoškolske biblioteke Bosne i Hercegovine Hercegovine = A guide to academic libraries of Bosnia and Herzegovina / pripremili Zijada Đurđević-Alidžanović, Ismet Ovčina i Amra Rešidbegović ; prevodilac Ida Rešidbegović. - Sarajevo : Nacionalna i univerzitetska biblioteka Bosne i Hercegovine, 2008. - 265 str. : ilustr. ; 30 cm. –(Edicija Stručna bibliotečka literatura). - ISBN 978-9958-500-32-9

Amela Lalić, katalogizator

amelal@nub.ba

Biljana Zarić, klasifikator

biljanaz@nub.ba

Nacionalna i univerzitetska biblioteka BiH

Zmaja od Bosne 8 b, Sarajevo

Nakon višegodišnjeg istraživanja, prikupljanja i obrađivanja podataka, u okviru izdavačke djelatnosti Nacionalne i univerzitetske biblioteke Bosne i Hercegovine za 2008. godinu, a u ediciji Stručna bibliotečka literatura, objavljen je Vodič kroz visokoškolske biblioteke u Bosni i Hercegovini. U izradi ovog veoma značajnog vodiča učestvovali su: mr sci. Zijada Đurđević-Alidžanović, dr Ismet Ovčina i mr sci. Amra Rešidbegović.

Nakon izdavanja Vodiča kroz javne biblioteke u Bosni i Hercegovini, pristupilo se opsežnom radu i istraživanju stanja u fakultetskim bibliotekama Bosne i Hercegovine. Njihov značaj u obrazovno-naučnom procesu BiH je neupitan, posebno ako ga posmatramo kroz prizmu Bolonjske deklaracije i standarda koji su tom deklaracijom zadati. Veoma važan zadatak fakultetskih biblioteka, koje imaju važnu ulogu u uspostavljanju bosanskohercegovačke akademske mreže, leži u dostupnosti informacijama relevantnim za područje nauke, koja se na tom fakultetu izučava.

Vodič se sastoji iz nekoliko dijelova:

U uvodnom djelu Vodiča kroz visokoškolske biblioteke Bosne i Hercegovine, dr Ismet Ovčina, direktor NUBBiH u predgovoru govori o značaju fakultetskih biblioteka i njihovoj ulozi u savremenom društvu. Mr sci. Amra Rešidbegović, pomoćnik

direktora NUB BiH za razvoj i obrazovanje ističe visokoškolske biblioteke kao neodvojivi segment akademskog obrazovanja i naučnog rada. Merima Botulja, šef sektora za informacije NUB BiH predstavlja LIBER i njegovu misiju u promoviranju interesa naučno-istraživačkih biblioteka u Evropi. O funkciji Vodiča, kao i njegovoj svrsi, namjeni i načinu prikupljanja podataka govori mr. sci. Zijada Đurđević-Alidžanović, rukovodilac Odjela za BIS BiH, koja je i direktno učestvovala u sakupljanju i obradi podataka.

U prvom djelu Vodiča date su opšte informacije, shematski i tabelarni prikazi o broju univerzitetskih/fakultetskih biblioteka u Bosni i Hercegovini. S obzirom da je Vodič izrađen na temelju uobičajene međunarodne metodologije, tj. putem anketnih listova, na str. 16-17 prikazan je anketni list u cijelini. Dio Vodiča koji se odnosi na fakultete Banjačkog univerziteta rađen je na temelju metodologije Matične službe Narodne i univerzitetske biblioteke Republike Srpske.

Sve napomene u anketnom listu su citirane iz popunjenih upitnika i stav su konkretne institucije koja je dala podatke. Dati su osnovni podaci za svaku biblioteku pojedinačno (naziv, sjedište, adresa, telefoni, e-mail adresa i sl.), te podaci o prostoru, opremi, fondovima, katalozima, korisnicima, kadrovima, edukacijama, bazama podataka i sl.

Drugi dio Vodiča daje podatke o univerzitetskim bibliotekama, dok treći dio obrađuje pojedinačno sve fakultetske biblioteke sa pregledom svih podataka relevantnih za ovaj tip biblioteka. Redosljed biblioteka je dat prema univerzitetima u Federaciji Bosne i Hercegovine i Republici Srpskoj.

U četvrtom dijelu Vodiča dat je abecedni registar svih biblioteka, kao i registar fakultetskih biblioteka po univerzitetima.

Posebno treba istaći činjenicu da su uvodna i zaključna razmatranja kao i originalni dokument Misija LIBERa objavljeni i na engleskom jeziku, što doprinosi dostupnosti njegovog sadržaja i čitateljstvu sa drugih govornih područja.

Najvažniji doprinos Vodiča kroz fakultetske



*Promotori Vodiča na
XX sajmu knjiga i učila
u Sarajevu:
direktor Goethe instituta
mr.sc. Michael Schroen,
dr. Lamija Hadžiosmanović,
mr.sc. Amra Rešidbegović
i dr. Senada Dizdar*

biblioteke u Bosni i Hercegovini je taj, što su u njemu izneseni rezultati istraživanja koji obuhvataju biblioteke iz cijele Bosne i Hercegovine, tj. iz Federacije Bosne i Hercegovine i Republike Srpske.

Nakon svega gore izloženog, možemo zaključiti da je postignuta osnovna svrha Vodiča, to jest da se bibliotečkoj i široj javnosti predstave relevantni podaci o visokoškolskim bibliotekama Bosne i Hercegovine.

U Bosni i Hercegovini egzistira 8 univerziteta, 6 u Federaciji BiH i 2 u Republici Srpskoj. U sastavu ovih univerziteta djeluje 99 fakulteta, 68 u FBiH i 31 u RS-u. Nažalost, konstatovano je da 21 fakultet nema svoju biblioteku. Kompletni podaci obrađeni su za 88 biblioteka (6 univerzitetskih i 82 fakultetske).

Najveći problemi visokoškolskih biblioteka vezuju se za nedostatan i neadekvatan prostor, nedostatak opreme za primjenu informacionih tehnologija, nedostatak sredstava za nabavku knjižnog fonda. Posebno treba istaći nimalo povoljan položaj visokoškolskih biblioteka, koje se danas suočavaju sa dodatnim zahtijevima, koji nerijetko podrazumijevaju njihovu cjelokupnu reorganizaciju. Prisutno je i marginaliziranje fakultetskih biblioteka i njihovih djelatnika.

Primjena novih tehnologija u bibliotekarstvu zahtijeva neophodno dodatno obrazovanje bibliotekara putem raznih studija, dodatnih specijalizacija, seminara, kurseva i sl.

S obzirom da je Bosna i Hercegovina u procesu implementacije Bolonjskog procesa u kojem reforme obrazovanja tek predstoje, visokoškolske biblioteke će se u ove procese morati uklopiti, da bi mogle

funkcionirati u evropskom prostoru. Izdavanje Vodiča kroz fakultetske biblioteke Bosne i Hercegovine doprinosi razvoju modernog bibliotekarstva kao sastavnog dijela demokratskog društva.

Vodič kroz visokoškolske biblioteke Bosne i Hercegovine uspješno je promoviran nekoliko puta.

Na Sajmu knjiga i učila u Sarajevu, Vodič je promovisala doc dr. Senada Dizdar, a posebno treba istaći obraćanje tadašnjeg direktora Goethe-Instituta, Mr. Michaela Schroena koji je naglasio da je donacija Goethe Instituta za izradu Vodiča u iznosu od 1.000 KM otišla u prave ruke, s obzirom na činjenicu da je ova publikacija jedna od najvažnijih izdatih publikacija u posljednjoj dekadi.

Slijedeća promocija je održana u okviru tradicionalne manifestacije bibliotekara „Juni na Uni“ u Bihaću, a promotor je bila mr sci. Amra Rešidbegović.

Prilikom otvaranja multimedijalne sale pod pokroviteljstvom Federalnog ministarstva za obrazovanje i nauku, Vodič je još jednom promoviran ponovo od strane doc. dr Senade Dizdar i ministrice Melihe Alić, koja je također iskazala riječi pohvale za izdavanje ove značajne publikacije.

Na sajmovima knjiga u Podgorici i Frankfurtu, promotor Vodiča je bio dr. Ismet Ovčina.

Na svim promocijama, istaknut je značaj koji ova publikacija ima ne samo za fakultetske biblioteke Bosne i Hercegovine, već i u okviru moderne bibliotečke struke uopšte.